



TAPAK 7

Mamata-i West Bengal nung PM Kisan scheme memela: JP Nadda

TAPAK 3

Meghalaya Governor-i jembiba onük Raj Bhawan-i jangjashitsür

VOL. XVIII NO. 114 (ADOK 114) DIMAPUR

AMUNGNÜ (SUNDAY) TSÜKLAI (FEBRUARY) 07, 2021

₹ 5.00

NE nem COVID-19 vaccine indang dose 1,055,160 agütsüogo

New Delhi, February 6 (Agencies):

February 1, 2021 tashi nung Northeast state tem nem COVID-19 vaccines indang dose 1,055,160 agütsüogo, ta Union minister of state for health and family welfare Ashwini Kumar Choubey-i Lok Sabha nung metetdaksüogo.

Tang linük ajungalen COVID-19 vaccine agütsüba maparen atema sorkar ket nung COVID-19 vaccine peria lir, ta paisa ashi.

"Universal Immunization Programme kübok tanga aliba cold storage ajungketogo aser COVID-19 vaccine ayutsü atema amshir. State aser UT nem agütsüba COVID-19 vaccine tem ayutsü atema storage space peria dang lir" ta Chaubey-isa metetdaksü.

Centre-i Arunachal Pradesh nem dose 62,000, Assam nem 6,08,160, Manipur nem 1,02,000, Meghalaya nem 69,000, Mizoram nem 35,000, Nagaland nem 49,500, Sikkim nem 26,500 aser Tripura nem dose 1,03,000 agütsüogo.

FEB 13 NUNGI DOSE TANABUBAANGUTSÜ

January 16, 2021 nü Covid-19 agirtemi February 13 nü tanabuba dose angutsü, ta tanü Union Health Secretary Rajesh Bhushan-i metetdaksüogo.

"Vaccine agütsüba maparen meyipa reprangogo aser maneni ketdangsürtemi iba mapa tuluba inyaka aotsüla" ta Bhushan-isa ashi.

"February 2, 2021 nungi frontline workers nem vaccine agütsütsü tenzükba sülen nungi nisung 3,70,693 nem agütsüogo. Iba ya frontline workers indang database nung 4.5% shi ka asütsü" ta Honibarnü Union Health Ministry Additional Secretary, Manohar Agnani-ia ashi.

India nung health care workers aser frontline workers 56,36,868 nungi healthcare workers 52,66,175 aser frontline workers 3,70,693 lir. Tang tashi nung healthcare workers 54.7% aser frontline workers 4.5% nem Covid vaccine agütsüogo, ta health secretary Dr Manohar Agnani-ia metetdaksü.

Iba osang zülü tashi nung tanü India nung nisung 11,713 dak COVID-19 aliba putetba osang angazükogo. Tanü putetertem züngsema linük nung nisung ajak agi 1,08,14,304 kümogo.

Maneni, tesüiba ghonda 24 tsüngda COVID-19 puteta alir nisung 95 süogo. Parnok züngsema linük nung tasür ajak agi nisung 1,54,918 liasü.

Jorhat nung teküp ayokba maparen inyaker apuani Nagaland nung apu



Jorhat, February 6

(Agencies): Assam kübok Jorhat district nungi apuani kati teküp ayokba maparen inyaka ta tai tonglokja puogo.

Tena ya Nagaland nung Mokokchung district kübok Changtongya nung apu.

Apuani na ya Dergaon nung Rima Das aser la kinungbo Titabar nung Pallab Handique lir ta jangjaogo.

Tena ya Honibarnep apu. Tenati Jorhat district kübok Bohotia yimtsüng nung tena kidang nungi teküp ayokba maparen inyaka ta tai tongloksür.

Assam Police den Nagaland Police telok kati yaritepa tena

apu.

February 1, 2021 nü Jorhat police-i ki ka mita aodang tanur tetsür 3 kümzüik. Rima Das aser Pallab Handique nati iba ka ya para agüja liasü aser tanur asemji tenati shibanga ayu aser teküp yokdaksü.

Tanur tetsür asemprongji Golaghat district nungi liasü aser parnoki police dang tatalokba ashidang, apuani na den tanga nisung kati parnok beauty parlour nung mapa inyakdaksütsü ta mesüka anir aruba metetdaksü.

Iba ken o nung tai tonglokja aliba nisung tasembubaji Sivasagar nungi Santanu Tamuly lir saka tang tashi ano pua maru lir.

MLA Moatoshi-i DGC nung Alumni centre cum waiting shed lapoktsü



February 6, 2021 nü Dimapur Government College nung Alumni centre cum waiting shed lapoktsüdang agiba noksa angur.

Dimapur, February 6 (TYO): Honibarnü Dimapur Government College nung MLA, Moatoshi Longkumer-i Alumni centre cum waiting shed lapoktsüogo.

Iba ya Dimapur Government College Alumni Association-i Dimapur Municipal Council den yaritepa Rs. 17 lakhs endoka yanglu.

Alumni Association-i tang agi mapatong tasembuba inyaksüogo. Tesüiba mapang parnoki welcome gate 2 aser college campus telung nung canteen ka yangluja lir.

"Iba ya loktiliba nem meyipa agütsüba inyakyim shitakba aser tatishitsü tajungtiba lir. Asenoki

temelenshi aginüra, asenok tejakleni anitsüpurtem indang tamajung jembiba aser lutsüba anentsüla" ta MLA Moatoshi-i Alumni centre cum waiting shed lapoktsüdang ashi.

Paisa iba tatishitsü aser mapa tajung atema Alumni Association aser DMC nem tenüngsang agütsü.

"Nagaland nung tanü temelenshi aika nüngdaker aser item rongnung, gari lenmang tajung, infrastructure tajungba aser rongsenkettsüng inloktsübatem lir. Maneni, temelenshitem rongnung Naga nung tsüngda putepa alitsüba aser loktiliba asoshi

inyaktsütsüba tangatetbatem dena lir" ta MLA Moatoshi-isa metetdaksü.

Sentong nung DMC Administrator, Albert Ezung-ia o jembidang Dimapur Government College Alumni Association-i lokti asoshi langka ka yanglutsüba atema pelaba metetdaksü.

Iba sentong nung mendenji DGC Alumni Association Treasurer, Mahesh Agarwal liasü, DGC Alumni Association Treasurer President K Temjen Jamir-i mapa inyakba osang tatsüka lemsatep aser Oriental Colony Council chairman aser DGC Principal natia o tatsütsü jembiba.

COVID-19 Nagaland: Nisung 22 dak putet

Kohima, February 6 (TYO): Honibarnü Nagaland nung nisung 22 dak COVID-19 aliba putetba züngsema nisung ajak agi 12,148 kümogo.

"Tanü Kohima nung nisung 22 dak COVID-19 aliba putetogo. Külen, nisung 5 taneptsü angu. Parnokji Dimapur nungi nisung 4 aser Kohima nungi 1 lir" ta Health & Family Welfare Minister, S Pangnyu Phom-i metetdaksü.

Nisung 12,148 rongnung nisung 11,826 taneptsü nguogo aser tang parnok 85 anepaludar, ta paisa ashi.

"Nagaland nung COVID-19 puteter nisung 88 süogo saka tasürtem rongnung nisung 10 bo tanga timtem ajanga asü. Külen, nisung 149 tanga state temi ogo" ta

Health & Family Welfare Director, Dr Denis Hangsing-i metetdaksü.

Nagaland nung COVID-19 nungi taneptsü angubaji 97.34% kümogo, ta paisa ashi.

District balala nung COVID-19 putetba: Dimapur (6,474), Kohima (3,834), Mon (605), Peren (507), Tuensang (248), Mokokchung (192), Zunheboto (142), Phek (47), Kiphire (41), Wokha (39) aser Longleng (19).

Nisung 12,148 rongnung Traced Contacts 5,031, armed forces personnel 4,674, tanga state tem nungi arur 1,870 aser Frontline Workers 573 lir, ta Dr Hangsing-isa ashi.

District balala nung tang anepalurtem: Kohima (58), Dimapur

(24), Peren (2) aser Tuensang (1).

Tang anepalurtem rongnung parnok 6 dak shirangba yimya terara lir aser 79 dakbo shirangba yimya kecha mali, ta paisa ashi.

District balala nung taneptsü angurtem: Dimapur (6,316), Kohima (3,713), Mon (594), Peren (504), Tuensang (245), Mokokchung (183), Zunheboto (139), Phek (47), Kiphire (40), Wokha (35) aser Longleng (10).

"Nagaland nung COVID-19 alitsü akok ta temolung melemi bilemba sample 1,26,187 tendangogo. RT-PCR ajanga sample 73,596, TrueNat ajanga sample 37,194 aser Rapid Antigen Test ajanga sample 15,387 tendang" ta Dr Hangsing-isa ashi.

Nagaland nung tanur ajak nem polio mozü jemdaksüogo

Dimapur, February 6 (TYO): January 31, 2021 nungi tenzükba Intensified Pulse Polio Immunisation district ajak nung takok ngua tembangogo.

Nagaland nung anogo ka tain tanur nungi arishi küm 5 tain tanur 100% nem polio mozü jemdaksüogo.

January 31, 2021 nü booth day agiba sülen kilen shia sema mozü

jemdaksüogo. Nagaland nung tanur 1,53,741 nem Oral Polio vaccine agütsüogo, ta State Immunization Officer (UIP) Directorate of Health & Family Welfare Dr. Ritu Thurr-i metetdaksü.

District balala nung tanur nem polio mozü jemdaksüba:

District No of children Vaccinated
Dimapur 45322

Mon 24309
Kohima 14901
Tuensang 13118
Wokha 10721
Phek 10429
Peren 9372
Zunheboto 8119
Mokokchung 7245
Kiphire 5828
Logleng 4377

Total 1,53,741

KSC-i Kohima yimtong design asütsü jaoker



Dimapur, February/Tsüklai 6 (TYO): COVID-19 wara sülen green recovery atema Ministry of Housing and Urban Affairs-i "Streets for People Challenge" tenzükogo. Iba sentong ya nūburtem tetsüing agi senzūsenpongtsü atema jenjang tapet agia aser nūburtem metiba tesemtem rongsen nungdenba tesem, timtem maliba tesem aser tanurtem asoshi tapet tesem ka kūmdaktsütsü asoshi yimitem ajungmesotsü nūkjidong nung amenok.

Kohima Smart City-i, Cyclists, Pedestrians aser tanur o yimtsüyimbu tem aser matamabensartem densema jila nung alirtem aser süngtonglitongtem den yimtong lemsateptsü nūngdakba indang tangatetba agütsütsü nūkjidong

nung 2020 küm October aser November tsüingda yimti telongtet nung Open Streets campaign tem ayongzūka agiogo.

Iba tayongzūka nung shilem ka ama Kohima Smart City-i, yimti kükob tesem ana atema open Design tetokteba ka ayongzükogo, aser iba Design tetoktepba nung shilem agitsü jangrartem tenüing <https://smartnet.niua.org/indiastreetchallenge/cities/kohima> nung züingoksemtü jaokogo.

Tenüing züingoksemtü atema tatembangbuba anogoji February 12, 2021 asütsü. Iba sentong ya yimti yimtongtem tanaben design süshitsü, tetoktepba nung takok angutsü aser design tem asangsang nung benokba ajangshitsü

asoshi lisopurtem atema maongka tajung ka lir.

Design tem ya tetendanger telok kati asadangtsü, kong Architecture, Landscaping aser Urban Planning nung mongintem densema alitsü aser result March 15 nū sangdongtsü.

1. Flagship Pilot site: Kohima Walkable Street - NST nung Razhu Point (330m).

2. Neighbourhood Pilot Site: BOC Market - PHQ Traffic Booth nungi BOC Market Area (93m).

Tesem anaprongla atema mezüingbuba jenjang nung takok angur nem senpet sen 15000/-, tanabuba- 10000/-, tasembuba- 5000/-, Gold Mention 2500/- aser Honourable Mentions den certificates (shilem agir 5) agütsütsü.

Zhaleo-i DPDB senden nung teti adentsü züingsemtem ajungmeso



February 6 nū Dimapur DC conference hall nung DPDB Dimapur mendenbuba aser advisor Zhaleo Rio-i DPDB senden nung shilem agiba noksa nung angur.

Dimapur, Tsüklai/February 6 (TYO): February ita atema Dimapur District Planning and Development Board senden February 6 nū Dimapur DC conference hall nung menogo. Iba senden ya DPDB Dimapur mendenbuba aser Advisor Zhaleo Rio lensüba kükob agia liasü.

Senden nung Zhaleo-i, züingsemtem dang District DPDP nung teti adentsü ajungshiba den, DPDB board senden ajanga sorkar sentongtem benoka inyaker ta shia board koda tongtibang iba indang lemsatep.

Paisa, züingsemtem dang, mepaitoktetba maparen kar ajanga senden nung shilem magitetsüsa kümra ketdangser tanga kar yoktsü ajungshi. Senden nung shilem tajung agiba atema züingsemtem dang pelaba lemsatepba den parnok tebilembatem sadem sadema lemsateptsü, Zhaleo-i ajungshi. Paisa, khuret angatetba

ketdangser ka ama COVID vaccination dak sendakba nung nūburtem nem osang tejangja agütsütsü ajungshiba den ajaki mask amshitsü nūngdakba lemsatep.

Taküm libaliro ajungkettsü aser employment tali adokdaksütsü atema Agri aser Allied sectors asoshi India sorkari senotsü agütsüba indang jembidang Zhaleo-i, Horticulture and Agriculture department dang taruba DPDB senden nung department inyakyimtem metetdaksütsü tuyu.

Senden nung DPDB Dimapur vice chairman aser DC Rajesh Soundararajan IAS-i, HOD tem dang pei tata mapang nung staff tem vaccine agidaktsütsü asoshi mepeshia liasü. Covid agi shirangertem tajemba kūmdar saka wara süshiogo ta mebilemtsüla, ta Rajesh Soundararajan-i ashi. Paisa, nūburtem aika vaccine agiba sülenang vaccine agütsütsü asoshi sentong

yangluba nūkjidong ataloktsü, ta ashi. Maneni pai HOD tem dang sentong balala ayongzūka agiba mapang sü agi yangluba banner tem amshitsü ajungshi, kechiyong India sorkari flex banner amshitsü tenokdangba agütsüogo.

Dimapur district nung COVID 19 tashidak indang lemsatepba mapang CMO Dimapur-i, tashidak menar ajak agi 6474 lir aser item rongnung nisung 6312 anepogo aser tang nisung 28 temang anepaludar, ta ashi. Laisa, yashi nisung ka dak danga tashidak mepotet, ta metetdaksü. Maneni lai, vaccine agütsüba sentong tanabuba sentong February 9 nū nungi tenzüktsü aser iba atema nisung 12000 züingoksema lir, ta ashi.

Senden nung board züingsemtemi taoba senden nung sensak asembatem lepa repringshi aser lokti tentet balala züingoksemtü atema benoka aliba agizüktsü asoshi lemtet.

Wokha COVID-19 DTF senden amen

Dimapur, Tsüklai/February 6 (TYO): Yakbang nung inyaker nem COVID-19 vaccine agütsütsü atema aser Mission Indra Dhanush IMI 3.0 dak sendakba nung ken o tem sensaka asemtsü asoshi Wokha District Task Force for immunization senden ka February 5 nū Deputy Commissioner Official chamber nung menogo.

District Immunization Officer, Wokha Dr. Khelito Zhimomi-i, tang tashi nung Wokha district kükob yakbang nung inyaker 1994-i vaccine agitsü atema parnok tenüing züingsokema lir, ta ashi. Zhimomi-isa, Yakbang nung inyaker nem iba ita tatemi vaccine agütsümatsü aser vaccine takok ngua agitsü atema Wokha district kükob Health Care Centers aser health care Units ajak inyaksangshi tenzükogo.

Yakbang nung inyaker nem February 8 nū 9:00 ako nungi vaccine agütsü tenzüktsü. February 8 nū Police (DEF & 7th NAP), Home Guards aser

Revenue staff tem nem vaccine agütsütsü aser February 9 nū 7th NAP Hospital Bhandari aser NEEPCO hospital Doyang nung vaccine agütsütsü.

Laisa, tenüing magütsü aliba line department tem dang February 7 nū tashi nung department indang list benoktsü aser vaccine agitsü mulunga alirtem tenüing upload sütsütsü atema tetuyuba agütsü.

Maneni Dr. Khelito Zhimomi-isa, züingsemtem dang Mission Indra Dhanush IMI 3.0 indang metetdaksü, koba February 22 nū tenzükogo. Iba sentong ya vaccine magidangi alirtem ayimjema agitsü asoshi amenok aser mission kükob mashisa aliba tetsürtem aser kinü tanur arishi küm 0-2 tsüingda alirtem dak rangloker inyaker, ta ashi.

Deputy Commissioner & Chairman District Task Force for COVID-19, Wokha, Orenthung Lotha-i, vaccine agütsüba sentong takok angutsü atema iba sentong dak sendaka alirtem ajaki teyari agütsütsü mepeshia liasü.

Tuensang nung JJM dak sendakba senden amen



Dimapur, Tsüklai/February 6 (TYO): February 5 nū District Water and Sanitation Mission züingsemtem senden ka DC Conference Hall nung menogo. Iba senden ya DWSM mendenbuba aser Tuensang DC Kumar Ramnikant IAS lenisüba kükob amen.

Iba senden nung Jal Jeevan Mission benoktsü asoshi sensak asem. JJM nūkjidongji yimdak yimtsüingtem nung kibongshia nem tajemtsü tzü tajung agütsütsü asoshi lir. Tuensang district nung inyakyim achaayangtsü atema Tolen Thangjam shimogo. 2024 küm tashi nungbo India kükob yidak yimtsüingtem nung tajemtsü tzü tajung agütsütsü asoshi JJM nūkjidong lir.

Kasa mapang nung Executive Engineer PHED Er. Kedolhuto-i, 2019-20 küm department inyakyim metetdaksü. JJM-i tesem tenet nung maparen inyaksü nūkjidong ayu, aser item

rongnung project asem tembanga inyakogo aser project pezü tetembanger dang lir, ta ashi.

2020-21 nung district kükob tesem 50 nung project benoka inyaksü nūkjidong lir aser item tesemtem rongnung yimtsüing 10 RD department kükob inyaksangshitsü aser tanungba tesemtem PHED kükob aittsü. Paisa, scheme kükob PHCs/CHC, School aser anganwadi center tem ajak nung water connection agütsüba indang metetdaksü.

Senden nungsa, tajemtsü tzü jenjang asadangtsü atema committee nung medical department züingoksemtü nūngdakba lemsatep. Paisa, JJM kükob water line tasen yanglutsüba aser line talila yanglutsüba densema lir ta ashi.

Maneni DC-i, züingsemtem dang JJM scheme nongita yaritsü mepeshi, ajita asünungdang district kükob iba sentong takok nung benoktetsü, ta ashi.

METONGSHITSÜR

Department of Information & Public Relations-i Nagaland Diary 2021 nung adokja aliba, Mr. Shikaho P. Yephtho, General Manager, Nagaland State Transport, Nagaland ya Er. Atovi Kiba, General Manager, Nagaland State Transport, Nagaland ta metongshia agitsüla. Aibelen asoshi sasa bilemer.



Guwahati nung aliba Khanapara Veterinary Ground nung Union Finance Minister Nirmala Sitharaman-i Assam Chief Minister Sarbananda Sonowal lia 'Chah Bagicha Dhan Puraskar Scheme' tenzüksüdang agiba noksa angur. (Guwahati, February 6)

Matamabensartem atema metsümeshidak alitsüla: Assam MP

Guwahati, February 6 (Agencies): Honibarnü Assam Congress MP Abdul Khaleque-i matamabensartem timtem melii metsümeshitsü atema Centre den jembitsü ta metetdaksü.

Abdul Khaleque-i Union Minister for Social Justice & Empowerment Thaawarchand Gehlot den iba onük lemsateptsü ta ashi.

January 28, 2021 nü Topcem Cement-i CSR programme nung shilem ka ama Guwahati nung Arya Vidyapeeth Higher Secondary School nung toilet block ka yanglutsü. Ajisüaka, iba toilet block nung matamabensar kaketshirtem aser tesayurtem atema metsümeshidak mali.

Khaleque ya Parliamentary

Standing Committee on Social Justice & Empowerment nung züngsem ka lir aser pai "Topcem Cement ketdangpurtem toilet block yangludang matamabensartem atema mebilemtsü atema sasar" ta ashi.

"Topcem Cement ketdangpurtem dang nübortem indang temeten akhümtsübutüsü mepishir aser Arya Vidyapeeth Higher Secondary School nung hassle-free toilet facilities agütsütsü mepishir" ta paisa metetdaksü.

Matamabensartem atema metsümeshidak alitsüla aser ibaji shisaliok rejutem nung kanga tongtipang lir ta Congress-isa ashi.

"Nüngdak süra, ni Ministry

of Social Justice & Empowerment dangi shidi zülutsü mesüra union minister den jembitsü" ta Khaleque-isa shisem.

National Centre for Promotion of Employment of Disabled People nung executive director Arman Ali-ia "school, kaketnang, mozü ki mesüra public kiojen nung matamabensartem atema metsümeshidak alitsüla" ta ashi.

Ibaji Rights of Persons with Disability Act ajanga temeten agütsür, ta Ali-isa metetdaksü.

Guwahati nung aliba Arya Vidyapeeth Higher Secondary School nung classroom ka toilet block kümstüba atema nisungtemi Topcem Cement ketdangpurtem aija liasü.

Tripura state cabinet ulushitsü akok

Agartala, February 6 (Agencies): Tan February ita Tripura state cabinet ulushitsü akok. Tang state cabinet nung züngsem 8 lir aser minister menden pezü tazüng lir.

Züngsem 60 agi akümbe Tripura state assembly nung 12-member cabinet ka lir.

Cabinet nung minister ana anentsütsü aser nisung 6 talila shimoktsü akok.

Minister inyaktsü atema shiba shimoktsü'ar memetet

saka caste, gender, district nung ajemdaker shimtsü ta osang angazüker.

Tripura assembly nung speaker, deputy speaker aser chief whip mapatem nung nübo melenteptsü akok.

BJP national president J P Nadda aser tanga tongti lennirtem nem state cabinet ulushitsü atema tashi agütsüogo ta BJP osang ajanga ashi.

Tawa tu Tripura chief minister Biplab Kumar Deb-i

New Delhi semdanga liasü aser idangji pai BJP central leaders den ajurutept.

Chief minister Deb-i tang department 27 ketdangsüa repranger aser iba ya opposition den par party züngsemtemia lutsür.

Tripura nung Opposition party tem aser state BJP party züngsemtemi sorkar ketdangsüba tajungba akümstü atema cabinet melenshitsü aser ulushitsü atema takhangba agüja arur.



Honibarnü Joint Movement Committee nungi teshimtet kati Tripura High Court-i aodnag agiba noksa angur. Tripura Police-i February 3 nungi Agartala City Centre nung lungkak aittsü memolungba sülen Tripura nung mapa nungi anentsüba tesayurtemi High Court dangi iba onük aben. (Agartala, February 6)

Imphal View Tower yakta lapoktsü: Manipur CM

Imphal, February 6 (Agencies): Manipur sorkari Imphal View Tower tasen yakta lapoktsütsü.

Honibarnü Manipur Chief Minister N Biren Singh-i Cheiraoching, Langol Hills nung yangluba Imphal View Tower semdang.

Imphal View Tower ajanga Imphal yimti indang 360 degree view angtusü.

"Cheiraoching, Langol hills nung tang tasen yangluba Eco-tourism project Imphal View Tower ajanga Imphal yimti ajunga angur. Imphal yimti reprangtsü atema steps 150 tema jajayonga atu" ta Biren Singh-i ashi.

Chief Minister-isa Kangla Palace nung bridge, footpath aser recreational park yangluba semdang.

Manipur tesayurtemi UGC pay akhangba kaketshirtemi pusemer



Imphal, February 6 (Agencies): Federation of Government College Teachers' Association (FEGOCTA)-i sorkar dang 7th University Grants Commission (UGC) Pay & Regulations 2018 meshia lungkak aitba nung All Tribal Students' Union Manipur (ATSUM)-ia pusema nungiter.

"Sorkari pay scale tasenba magütsüba atema jashir. UGC 7th Pay and Regulation 2018 ya national policy ka lir aser sorkar college tesayurtem nem agütsür. Anungji sorkari iba ya mapa kuma inyaktsüla" ta ATSUM-i metetdaksü.

2018 nungi FEGOCTA

kübok tesayurtemi UGC 7th Pay and Regulation 2018 meshia arur saka tang tashi mapa kuma meinyaker.

Iba jagi tesayurtemi sorkar college balala nung mener lungkak aitba sentongtem ayonga agir.

"FEGOCTA-i takhangba agütsür aser sorkar college nung tesayurtemi tang agi anogo tenetbuba mener lungkak aiter" ta Education Secretary, ATSUM Kaikho Hopeson Mao-i ashi.

Manipur state cabinet-i August 6, 2020 nü UGC scale tasenba agütsütsü molunga agizük saka tang tashi mapa kuma meinyak lir.

Meghalaya Governor-i jembiba onük Raj Bhawan-i jangjashitsür

Shillong, February 6 (Agencies): Meghalaya nung Inner Line Permit (ILP) inyakyim tenzükra lendong adoktsü ta Meghalaya Governor Satya Pal Malik-i ashiba sülen tanü Meghalaya Raj Bhawan-i iba osang jangjashitsüogo.

Governor Malik-i ILP system indang jembibaji pa indang kija tebilemba lir ta Honibarnü Meghalaya Raj Bhawan-i ashi.

"Pai Meghalaya nung ketdangsürtem aser nübortem

dang pai bilemba lemsatepogo. Ajisüaka, iba mapa ya nüngdak ta bilemba, Centre dangi abentsü atema pai yariteptsü tas shiogo" ta Raj Bhawan-i metetdaksü.

Governor Satya Pal Malik-i Centre dang iba osang kecha mesangoktsü ta parnokisa ashi.

"State nung ILP benokba ajanga tourism aser investments nung timtem ajurutsü" ta Governor Malik-i ashi.

Paisa state nung lisopurtem kümzüka ayutsü atema travel document amshiba nung mashishiteper ta shiogo.

Mizoram nung Rs 16,07,700 apu

Guwahati, February 6 (Agencies): 23 Sector Assam Rifles nung Aizawl Battalion-i India sen 16,07,700 den motorcycle ka aser mobile phone 3 puogo.

Mizoram nung Champhai district kübok Diltlang yimtsüng nung item ya apu.

Hokolbarnü Assam Rifles aser Mizoram police telok kati Diltlang nung mita

aodang nisung ana apu.

Ano, Serchhip Battalion-ia Sesih yimtsüng nung kozüjang bosta 390 apu.

Iba mapa ya Assam Rifles aser Champhai district nungi custom preventive force yaritepa inyak.

Parnoki apuba kozüjang indang jenjangji Rs 85,17,600 shi liasü.



TIR YIMYIM YIMOBILEM (EDITORIAL)

DIMAPUR AMUNGNÜ, TSÜKLAI (FEBRUARY) 07, 2021

TENÜNGSANG AGÜTSÜBA

Khristan purtem atema taküm arishi aser nüngdakba rongsen ajak angudak lenmangji Tsüngrem nem tenüngsang agütsüba ya ka lir. Alima nung alir takar aser tulurtema tenüngsang angudang pelar aser peladangbo sensaker aser tilartem nem memeshidangyongi teyari tulu agütsür. Iba amaji asenoki Tsüngrem nem tenüngsang agütsüadang Tsüngrema pelar aser kodang asenoki Tsüngrem peladaktsüdir, asenoki memeshidangyongi Pai asenok moatsür. Khristan taküm ka atema jangratemtsüji ibaji asütsü. Asenoki sen teraka angutsü atema anogo piyong belemseta inyaker saka Tsüngrem nungi temoatsü angutsüabajibo melamellar kechiyong asenoki Pa nem tenüngsang dang agütsü nung pai asenok moatsür. Tenüngsang agütsüba mulungjangji Tsüngremi aginer. Tsüngremer temoatsüji anogo shia asenok inyaksangshiba nungi angur. Asenok shisabolua timtema alidang tembar, kiyonger mesüra kinünger kar nungi o tajung ka agi asenok mulung süneptsür, lenmang sayur aser teyari agütsür. Khenkhenbo memetetba lenmang aser memetetba nisung nungi asenok teyari angur. Asenok aneper aser asenok mulung anisüngzüker. Item ajakji Tsüngrem nungi anguba temoatsütem alitsü. Kenü anogo zütsüra aketba nisung ter-i Yisu ajuru aser parnoki ola adoka Pa dang taneptsü taochi meshi. Idangji Yisui parnok dang parnoksa oa parnok temangji purtirtem dang sayutsü ashi. Anungji, parnoki tashi angaa putirtem dangi aoba mapang, len tom nung parnokji anepadok. Kodang parnok nisung ter rongnung kati pa dak zütsüra adoka aliba to anepogo ta metet, idangji pai Yisu tonga oagi Pa tsüngdang aputaka tenüngsang agütsütsü bilemtet. Paji Samaria nung ka liasü. Idangji, Yisui pa dang asüngdang, ni nenok ter aneptsü masü no? Tukubo kong ali? Iba bendanger nisung ka dak alaka Tsüngrem tenüng asangtsü meyipa arur shinga mali no? Iba otsü ya asenoki Luke tapu 17 nung shia angur. Yihuda nung asoshi zütsüra tashidakji tesempatsü aser tashipangtsü tashidak ka liasü. Item zütsüra aketertem to pei yimtak aser pei kidang pei kinüngertem den alitsü mekoki aliba mapang ka parnoki Yisu ajuru aser parnoki meshiba ama parnok nem Yisui taneptsü taochi agütsü. Ajisüaka, Samaria nung ka dak alaka par tukui parnok anepba asoshi Tsüngrem nem tenüngsang agütsütsü mebilemtet mesüra mapang magütsütet südi. Parnok pei kinüngertem dena melitetsüsa aliba tashidak ka ajungbena ka anep nungji pelakanger parnok tukuprongla to Yisu alidak masü pei yim, pei ki aser pei kinüngertem ajurua matateti aritepa ao südi ta bilemer. Aiben asenok timtem aser nüngdak nung Tsüngrem dang meshia sarasademer. Iba amaji Tsüngremi asenok nem takok agütsür, jala jabaso moatsür, tashidak aneptsür. Alu nung metsü prokdang temoatsü meshia sarasademer proker saka alu rozükerbo Tsüngrem nem tenüngsang agütsütsü amadoker. Tsüngrem dang mapa meshia sarasademer saka mapa ngurbo asenoki Tsüngrem amadoker. Paibo asenok moatsüogo, asenok aneptsüogo aser asenok nem takok agütsüogo saka asenoki Pa nem tenüngsang magütsüteter. Tenüngsang ken 121 nung ashir, kü teyari ajak Tsüngrem nungi arur. Aji oda, kechisarina ajak nung asenoki Tsüngrem nem tenüngsang agütsütsü mamali. Kodang asenoki Tsüngrem nem tenüngsang agütsüdir, idangjiang ano asenok temoatsü tuluba angur. Filipi 4 nung ashir, kecha nunga temulung tadem, saka nenoki tenüngsang agütsüba agi nenoki mepishiba Tsüngrem nem metetdakjang. Zütsüra aneptsür tukutobo kong lir ta asüngdangba ama, asenoka kong lir ta Yisui masüngdangtsüsa asenok mulungjang tenüngsang agütsüba agi sünga alitsüabaj kanga tongtibang lir.

OLEMSABANG

TANÜ PUTU DEN APET AROGO TENYABA MAPA

~ Dr. Supongmayang Longkumer (Bangaraper)

Okila

Arogoji Tsüngrem, Laishiba, aser meimchir lokti tamang nung ajemdaker yanger. Saka kodang arogo aser lokti tentet balala nung Laishiba aser Tsüngrem indang aibelena ratettsübatem amshia arur; süra iba ratet jagi kechi koda asenoki asen putu den apet tenyaba mapa nung nübur ajangzüksü? Arogo nung pei santem den koda tesendaktep nung alir iba jagi arogo jenjang aser tenyaba mapatem sayur. Sama aliba santem kong ali, ibaji asüngdangtsü aser shisadangtsü tongtibang lir. Covid-19 wara ajanga alima rangpen nung meimchirtem ajak asoshi tetsübu, ratamata, teyimla samaba, melemsa kümdaktsüba, timtem-toushi, aser tasüba jenti bener arutsür. Süra tanü tensa den apet arogo shilem kechi asütsüla. Item onüktem nung ajemdaker yangi shisadokden-o kar tongmelang agi lemsateper.

Laishiba, Tsüngrem indang Bushiba, aser Arogo

Laishiba ya, taküm aser tanela tekümtet aser teyimla agütsüba kisung masü, saka iba dak alia wain-shi puti tesayuba jenti zülua angur, tat. agi, Laishiba nung azü-tokshiba aser shi-azü masüngteti ayuba aika shia lir. Lipok 4:1-19 nung Kainitenu Abel anema apuso aser pa tepset; 1 Samuel 17:1-49 nung Dawid-i Goliat tepset, aser nisung tepsetba nung Dawid nung toshiba; Lipok 19:8 nung Lot-i par jala ana Sodom nungner nem, memetetba nisung ana atema, parnoki mulungba ama par jala madak beshiang ta ashi (tashiyim inyaksü atema); Tenyartem Mapa 8:3 nungji Saul-i arogo rishikangshi, aser ibala ama mesükba tatishitsütem aika lir. Saka, arogo-i iba ama nisung tepsetba, rishikangshiba, aser tashiyim mapatem inyaksü mesayur. Süra kechiba asenoki Laishiba nungi tekongtem kar shimteta kechi koma (shitak) zülua ali yamaji beshir? Tatishitsü agi, 1 Korint 14:34-35 aser 1 Timoti 2:11 nung tetsürtem mokorai lidakjang, mesüra Mathi 19:12 aser Tenyartem Mapa 8:26-29 nung tetsür-a masü, tebur-a masü atsüabong indang shia lir. 'Tetsütem mokorai lidakjang' ta asüba ya asenok arogotem nunga kechi tashi beshir mesüra English nung 'eunuchs' ta asüba nisungtem ya asen Ao Laishiba nung 'teyangluba nisung' ta dang agüja lir. Parnok ya kechi, koba tashi arogo tenyaba mapa nung amshitsü bilemer aser angateter. Ano arogo nung kangabo bulua tema nung mejembiba onüktemji - tanur raksa indokba, kin-o-kin na nemtsüa bilemba, tebur-i dang yimsüasüba yimyatem, sadangsara, tangar majung jembitsüba, aser iba mesükbatem aika lir. Kobika arogotemi item tebilemtsü ashibanga mesüra miima ayuba ama dang alitsü aser item tangatetbajibo tai ta angatetdi. Item lokti temenen anema arogoi yimjak nung jembia tangatetbashesatsü tajung nüburtem den lemsateptsü mapang, kechiba süra iba jagi nüburtem tai tangatetba melenshitet. Laishiba tangatetba aser ratettsüba nung aibelena mesüra Lai tekong ishika shimer iba jaki tangar nemzüka yuja alinungbo, kija aser arogoi aibelenbaji agizüka melenshitsüla. Iba jaki dang arogo nung temelenshiba aser tabensaba tajung bener arutet.

Tanü putu den apet arogo tenyaba mapa teinyaksü koba nung yakta shishia kongshiba (sensitive) aser tensa den sütepba Tsüngrem indang bushiba onüktem nung olemtep mapang shia arogo nung lenirtem akatsübaji tongtibang. Tamang tesayuba nung ajemdaker olemtep melira kodasür arogoji tejakleni tensa den peta mapa inyaksü? Tensa den apet tebilemtsü olemtepba jagi Khristan tesyuba asen sobaliba den lirumedema otettsü. Asenoki metet, Lai ratetba ya Anülulen lima nungi aru aser parnoki kechi ratettsür aji shitak ta tamang yimsü nung agizüka aru. Saka asenoki itemji kanga shisadanga agizüksü nüngdaker. Kechiba süra, Lai-o ratetji tetezü ka dang masü, saka leman aisü nung meyiptet. Alima aienba aser tejakleni aoba ama Laishiba ratetba aser Tsüngrem o bushiba nung kanga kara tejakleni aoer. Arogotemi tensa den apet, ainkar mapa ama tenyaba mapa agi loktilibaren nung ochimashi mapatemji ola adoka aitsür asü masü; nüburtemi ochiba azüiteter asü masü; tamang yimsü aser tanelaren bendangtetsüla; koba tia mesüra tensa nung südir-süaka tamang akangshidaktsüba arogo nungdaker; Arogoji arok meyong, Khrista temang nung shilem balala ama miemchir ajak Tsüngrem tsüngdang tongtibang lir.

Tajaba Mapa aser Arogo

Arogo aser lokti tentet balala nung tenzükertem ya teti atema masü, saka mapang tatakzük ka asoshi dang alir. Iba tangatetba nung tenyaba maptem inyaksübaji tongtibang. Hao, Tsüngrem tenzükbaji, arogo aser tentet balala nung lenisüba mapang tashi dang masü, saka taküm piyong tajaba mapa nung inyaka aotsü mapa ka lir. Na aser ni lenir jenjang nung aliba mapang kechi mapa ajanga lokti nung temelenshi aser tasen kümshiba bener arutsür? Tenzükba koba jenjang nung lider liang, mezüng tajaba mapa, khuret, aser teinyaksüji Tanela Temeshi dena sama aliba tanelatem aser amangbapurtem Tsüngrem shisatsü dangi anir arutsübaji tongtibang shilem lir. Asenoki metet, Laishirtem aika mapa manguba ajanga tesüleni atsünga aobaangur aser meteta lir. Ano züngsem karbo arogo nung tanishir jakla yimya masüba inyakba ajanga arogo nungi atsünga aortem-a lir. Karbo arogo tsüngdang tai kar inyakba ajanga arogo züngsem nungi tenüng endokbatem lir. Yamaji ano kar atemabo arogoji parnok jenokba sabang ka ta mebilemer. Aser ibala mesükbatem aika dang lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Alempang Arogoi Meranga Inyaker Taküm Alitsü (MITA) Ministrytenzük



February 5, 2021 nü Alempang Baptist Arogo-i achayangba 'MITA Ministry' ta sür mapatong ka Nagaland PWD Housing & Mechanical Minister, Tongpang Ozüküm-i ABA Pastor Complex nung tenzüksüdang tangokba noksa nung angur.

Mokokchung, Tsüklai/February 06 (TYO): Alempang Baptist Arogo-i achayangba 'MITA Ministry' ta sür mapatong ka Nagaland PWD Housing & Mechanical Minister, Tongpang Ozüküm-i February 5 nü ABA Pastor Complex nung meraketa tenzüksüogo.

MITA ministry tetezü 'Meranga Inyaker Taküm Alitsüla (MITA)' ta asüba mapatong ka lir. Iba ya Alempang Baptist Arogo-i inyakba social ministry tongtibang shilem ka lir. Ibai tongtibangsa lanur zünger mapa mangur aser züngtor alir lanur teyakyak sempet aketer nem pei sasa mapa meranga inyaker tepok sünga lidaktsütsü asoshi maongka lapoktsütsü aser parnok ajak senso/tamanger tajung kaka kümdaktsütsü nükjidong yur tenzükba lir.

Iba mapatong lapokja Minister, Tongpang Ozüküm-i jembidang, Arogo ya tamangba dak rangloker inyakba telok ka lir, ajisüaka Arogo teinyaktsü dang nungi alia iba ama mera agiba ya Arogo aika nung mangu, ta ashi.

Lockdown ajanga alima rangben langkoshishi kümatok,

aji oda India nunga mapa aika anentsüsa aküm aser iba wara ajanga state sorkara sentsüh tulu atsüh aser sorkaria mapa aika inyaktsü merangaka mayimjemteti aliba tensa ka nung Alempang Arogoi mapa tajung inyakba asoshi tenüngsang o ka lemsatep.

Paisa lockdown ajanga Naga nunger nem temoatsü bener arutsüba indang kar lemsatepdang, mezüngbuba nung - nüburtem anema alitsü asoshi inyakba 'health sector' tsütsü jenjang tajungba aküm, tanabuba nung - nüburtem jabangmayim pei sünütsü süa litepba mapang 'Epidemic Act' ajanga nüburtem tsüngda rongrongshirong madoki zep ta azüokba aser tasembuba nung - Naga nungeri iba wara ajanga mapa meranga inyaktsü yimdangi arudaktsüba aser ali dangi meyiptsü tangatetba agütsüba, itemji lir, ta ashi.

Tang Naga nunger rongnung Chakesang nungeri aluyimba (Agri and allied) tsütsü temulungkanga agütsür, anungji, mapa tajungjibo asenok ajaki parnok dang nungi ajizüktsüla, ta paisa mapa meranga inyakba kuli kar bener arua lemsatep.

Mapa tulu/tila ta kecha mali

saka tanü Naga nunger business aser tanga mapa nung takok mangubaji nendaka aser bendanga meinyakba ajanga lir, ta pai ashi.

Shirnoki mapa inyaktsü aaka bilemer parnokki tangar memeneptsü aser mapa meinyakra alima tejakleni kodanga maotsü, anungji mapa meranga inyakba sobaliba angazüktsüla, ta paisa ayongzüka liasü.

Tanep MITA kübok food processing tenzüker aser iba mapatong atema mezüngbubaren nung lanur parnok 10 - tetsür pongu aser tebur pongu shima lir aser parnokki küm ka Arogoi lenmang balala nung yariteptsü aser mezülongi pei sasa tekong songteta yoktsü sentong lir.

Alempang Arogo MITA ministry kübok an & ak metsüba (poultry & piggery) aser süngsen aser yongsen mapatong (furniture & handicraft) balala tenzüka aotsü sentong lir.

Iba sentong nung ABA Pastor, Rev. Dr. Temsü S-i iba ministry tenzükba nükjidong lemsatepba den külemi iba mapatong takok angutsü asoshi temoatsü meshia sarasademtsü.

Eritrea linük nung tepuokdak asem nungi Khristan 70 chiok

February 06, 2021: Eritrea linük nung aliba jail asem nungi Evangelical Khristan aser Orthodox Khristan 70 küm 2 nungi 12 tashi tepuokdak ayuba sülen chiokogo.

Eritrea nunger nütsüng tesadangbo Khristan lir, ajisüaka sorkari agizükba denomination nungi masüba Khristantembo kanga reshikangshir. Ken o manganangi Khristantem tepuokdaki yoker aser reshikangshir.

February 1, 2021 nü linük yimtiba, Asmara anasa aliba Mai Serwa aser Adi Abeito jail na nungi Khristan tetsür 21 aser tebur 43 chiok, ta Christian Solidarity Worldwide (CSW)-i metetdaktsü.

Iba jakdang January ita tatembanglen Khristan tetsür 6 chioka liasü. Yimjak nung tekülem agiba atema

tetsürtemji apu.

Tang Eritrea linüki Ethiopia kübok Tigray region nung rara adoka aliba nung shilem agidar. Eritrea nunger sepaitemi iba rara nung nisung jenti tepsetdar.

CSW tentetsang aser Tir, Mervyn Thomas-i, "Onoki alima linüktem dang Eritrea linük dang tamangba yimsü nung ajemdaker tepoukdak yua alirtem ajak chioktsü atema akhangtsü mepishir. Onokisa Tigray nung rara anentsü atema rongdak süa inyaktsü mepishiba den külemi Ethiopia aser Eritrea linüki meimchir temedentem anema inyakba atema ketdangsertem nem temerenshi agütsütsü mepishir," ta metetdaktsü.

Eritrea nung tamangba yimsü nütsüng timbaka Abraham dak sendakba yimsü amangertem lir. 2002 küm

nungi Eritrea sorkari official süa Eritrean Orthodox Tewahedo Arogo, Eritrean Catholic Arogo, Evangelical Lutheran Arogo aser Sunni Islam yimsütem agizükogo.

Tanüngba tamangba yimsü aser denominations-ia register asütsü nüngdak, saka register asütsü memelar. Register asütsü atema sorkari züngsemtem indang nija osangtem meshir.

Eritrea nung tongti yimsü anaji Khristan aser Islam lir.

Pew research ajanga ashiba agi, Eritrea linük nung nütsüng shilem 63 bo Khristantem lir, iba sülen Islam yimsü amanger shilem 36 aser tanüngba yimsü balala amangertemji shilem 3-4 shi lir.

Eritrea nunger aikati yimsü metsünga-reta amanger aser yimsü balala amangyonga putu aika parnok tsüngda tesünep nung alir.

ANOGO ABEN TSÜNGREM DEN

Balaka masüba nung balaka Anitet 3:2-4

Mosa pa anogoshia mapa ajanga aodang pai mapa tilaka ajangshi: süngsem ka arongba. Mosai ano idakji mapa balaka ajangshi. Süngsem nungji mi jangruaka aji marung. Mosai anasai or reprangtsü meyip. Kodang Tsüngremi Mosa pa anogo mapa nungi meyipba angu, pai pa den jembi. Mosa taküm nung Tsüngremi küm lir inyaka aruba iba anogo tematiba jenjang atong. Tekümtet mapa asoshi Tsüngremi Mosa ataa aliba iba anogo nung metetdaktsü.

Na mapa tilaka nung dang alitsü akok. Saka iba mapa nungjiang Tsüngrem tatenba lia mapa tulu inyaktettsü akok aser ibajang ne taküm nung shidakba mapaji asütsü akok. Kanga mazüangi aliba mapang nung Tsüngremi ne den jembitsü akok. Ne telangzüba mezüngbubahi "Ni kanga aniatoker. Ni ibai asüngdanga motettsü" ta langzütsü akok mesüra, iba atema küni kecha timtem magitsü ta ashitsü akok. Saka iba mapang Tsüngrem ajurutsü temeja mapang tajung ka asütsü akok.

Yimya agi Tsüngremi taküm nung tajangshiba tila nungi jembir. Aiben na tenla kidang tekülem nung mejembir. Tsüngremi otsü nung temelenshiji tila ka ajanga dang tenzüker. Kodang nai mapa tila ka nung mebilemba kar ajitetdir, aki ama mapaji teinyak. Iba mapaji melenshitsü asoshi Tsüngremi shiteta ayuba mapang na aser temeket nung alirtem asoshi asütsü akok.

Karnataka nung Khristantem tekülem tagidak mapang amak


February 06, 2021: January 31, 2021 nü India kübok Karnataka state nung Khristantem tekülem sentong tagidak mapang nung Hindu nationalist temi amakdang Khristan 28 yiru aser parnok rongnung nisung trokbo hospital-i anir ao.

Karnataka nung Ramnagara District kübok Horahalli yimdak aliba Jeevadayaka Prardana Mandira Arogo Tenla kidang Khristantem tekülem sentong tagidak mapang nung Hindu yimsü alia amanger nisung 30 shi arua Khristantem dak azük.

Hindu nunger jagi "Jai Sri Ram" ta yimyim ayima Tenla ki telung jagi aiba sülen Arogo pastor dak tama azük, iba sülen Arogo züngsemtem dak azük. International Christian Concern (ICC) den jembidang Pastor Subash-i, "Parnoki kecha mejembii Tenla ki telungi ait. Ni kanga aoksa, nisung ajaki ayimten aser jepa liasü," ta

metetdaktsü. "Parnoki kü dak aiben tsüngoktsüba sülen ni ali nung lao. Tang tashi ni mejajateter; kü kinüngtsü aser jala nati ni kümzüksü merangba mapang tenata yiruogo," ta pastor-i ashi. Tenük kuli alirtemi ashiba agi, Hindu nunger jagi Laishiba amshia Khristantem dak azükba aser Tenla kidang oset balala raksaja liasü. Iba tatalokba osangji police nem metetdaktsüba sülen police station nung First Information Report (FIR) ka benokogo. Hindu nunger 30 nungjagi nisung pezü jangjaogo aser police nem par pezü tenüng agütsüyonga tang tashi parnok shinga mapu. January 31 nüji (Amongnü) Jeevadayaka Prardana Mandira Tenla kidang Khristan 120 shi liasü. Pastor Subash-i ashiba agi, iba tatalokba sülenbo Khristantem aika tsübuteper.

OLONG PAITEP # 5717



TIPIEN

2. Teburtemi tejak nung awaba - (8)
 6. T _ _ _ em - (3)
 8. Tzük ayudak - (3)
 9. Nüngdakba dang timba - (6)
 11. Züina ao - (4)
 12. Yangi tzü angur - (5)
 14. Tangar dang nungi tali - (4)
 16. Senyong masü - (6)
 17. Oadokdi - (3)
 18. Tzü tarok - (3)
 19. Yimtakir aikati iba ya ki den külemi yanglusemer - (8)

LANGTSÜNGLEN

1. Temejangdak - (6)
 3. Nisung ka mapa inyaksü nübo - (4)
 4. Azüntsü asoshi mejemba - (6)
 5. Tesangwa agütsüba - (5)
 7. Tila masü - (4)
 10. Tebenjem tetsür chanu - (4)
 11. Tekolak nung inok - (4)
 12. Tetsünga - (6)
 13. Tangar inyakba ka inyak - (6)
 14. Tim masü ta ashi - (5)
 15. Asalendong - (4)
 16. Tanüdagtsü - (4)

OLONG PAITEP # 5716 TELANGZÜBA

TIPIEN :

1. Telok, 4. Aluru, 6. Ozünga, 8. Emk,
 9. Kin, 10. Teti, 12. Süir, 13. Jen,
 14. Ola, 16. Talak, 17. Mazük.

LANGTSÜNGLEN :

1. Tenükjang, 2. Luden, 3. Kioktsü,
 5. Lenti, 7. Tajangzük, 11. Teronem,
 12. Sempa, 13. Jahaz.

Agüja aliba noksa nung meputepi aliba bushiang



KOMA SÜLA TELANGZÜBA

Q. Nagaland nung COVID-19 vaccine ya taginür ajak nem angati agütsü nunga koma süla ?

Tagir aikabo malitsü kechiyong Frontline worker aikati vaccine agütsü memolungtepba osang angazüker. -SMS

Asen state sorkari ket nung iba ama vaccine angati agütsütsüsa tashi mali. -SMS

Sorkar mapa inyaker nem itasena dena magütsüter nung kodaser vaccine angati agütsütsüaka! -SMS

TANÜBO NAI LANGZÜANG

Q. Traditional Knowledge Digital Library ya _____ ajanga tenzük.

A. Ministry of Ayush B. CSIR C. Both A and B D. Ministry of Health

===== (Taruba adok nung onoki langzüksü)

YASHI ADOK TELANGZÜBA : 1959



Tanur asoba anogo nung salem osang den noksa angati adokdaksünura - Tenünga, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela
Tasoba Anogo



1. Tenünga :
 2. Tasoba anogo:
 3. Küm : 4. Class :
 5. School :
 6. Talidak :
 7. Salem osang :

NAI-A YA METETTER MA?

FEBRUARY 07 NÜ ATALOKBA KAR:

- 457 - Leo I ya Byzantine Empire indang emperor aküm.
 1550 - Giovanni Maria del Monte ya Pope Julius III ama shim.
 1613 - Michail Romanov (arishi küm 16) Russia indang Tsar aküm.
 1792 - Austria aser Prussia na anti-French covenant sign asü.
 1812 - New Madrid, Missouri nung 8.2 magnitude menoknok anak.
 1922 - NYC nung John Willard indang "Cat & the Canary" sayu.
 1961 - NBC drama "A String of Beads" nung Jane Fonda-i acting tsütsü mezünga shilem agi tenzük.
 1962 - Luisanthal coal mine Voelklingen Germany nung gas apokba lendong nung nisung 298 taküm sama.
 1964 - Baskin-Robbins-i Beatle Nut ice cream introduce asü.
 1969 - Al-Fatah lennir Yasser Arafat ya PLO indang president aküm.
 1973 - The Stooges-i parnok indang kensep tasembuba "Raw Power" saya.
 1984 - CBS ajanga Michael Jackson nem süklep 4 talang platinum disc ka agütsü.
 1985 - "New York, New York" ya New York City indang naklo ken aküm.

SUDOKU # 5758

		9	6		3	7		5	2	8	5	6	7	9	4	1	3
3		8			5		4		7	6	1	8	3	4	2	9	5
		1			7	3			4	3	9	1	5	2	6	8	7
6			5	8	4	9	1	7	6	4	3	7	9	8	1	5	2
	8		3	9	1		6		1	5	2	4	6	3	8	7	9
9	1	4				8			8	9	7	2	1	5	3	4	6
	3		4		9		2		5	7	8	3	2	1	9	6	4
8	5		1		6				3	1	6	9	4	7	5	2	8
4	9				8	1			9	2	4	5	8	6	7	3	1

TELANGZÜBA # 5757

OJANG LUTEP # 5305

- MTSHIAACJEÜ :
 RASE :
 ASÜOBENSHI :
 MELHIBENSA :
 MAA :
 ALILIBRO :
 ERAS :
 ETNTATGABA :
 MESHILENA :
 ÜLAOTSA :

OJANG LUTEP TELANGZÜBA # 5304

TANGAR TIMTEM LENDONG AJURUA ANGUDANG NISUNG
 TAMAJUNGERBO ITEMJI NGUA PELATEPER

TAN HOPTA ATEMA - KOMA SÜLA ?

Q. Arogo nem Tsüngremer mapa inyaksü asoshi peii ajangzük tetba rongsen nungi 10% tenla agütsüba ama government nema terenlok mapa inyaksü atema 5% agütsü nunga koma süla ?

Olong 20 shi nung February 12, 2021 tashi nung iba telangzüba ya onok dangi (e-mail - tiryimyim@gmail.com) :
 (SMS - 9856121232 / 9436072422) : (WhatsApp - 7005723372 / 8729995804) : (tiryimyim.in) ajanga yokang. Telangzubatemi taruba Honibarnü adoktsütsü.



New Delhi, February 06, 2021: Honibarnü New Delhi arrtsülen Ghazipur nung aluyimertemi aluyimba ozüing tasen asem anema lenmang mokdang longkak aitba anogo nung sepaitem security akangshir aliba noksa nung angur.

Aluyimertemi Punjab aser Haryana nung Highway aika mokdang

New Delhi, Tsüklai/February 06 (Agencies): Honibarnü aluyimertemi sorkari benokba aluyimba ozüing tasen asem anema linük tesem aika nung lenmang mokdanga longkak aitba mapang Punjab aser Haryana na nunga highway aika mokdanga liasü.

Delhi arrtsülen aluyimertem longkak aitba tesem balala nung Centre sorkari internet services anentsüba aser sorkar ketdangsertemi aluyimertem dak tashiyim amshiba anema-a parnoki longkak aitogo.

Aluyimertem longkak aitba tesem nung police-i security akangshi aser gari tanga lenmang nung senzüdaktsütsü atema achaayanga liasü, ta

ketdangsertemi metetdaktsü. Osangbener den jembidang Bharti Kisan Union (Ekta Ugrahan) general secretary, Sukhdev Singh Kokrikalan-i, parnoki Punjab nung district 15 kübok tesem 33 nung gari lenmangtem mokdang, ta metetdaktsü.

Honibarnep aluyimertem Haryana aser Punjab naprongla nung longkak aittsü aliba tesem nung kanga longsoa adenshia liasü.

Punjab-Haryana arrtsülen Shambhu nung longkak aiter kati osangbener dang, "Longkak aitba nung shilem agitsü atema taintem aser lanurtem yangi adenshiogo. Onoki tesünep nung longkak aittsü," ta metetdakja liasü.

Ano longkak aiter kati, "Onoki sorkar nem ozüing asem ya agiendaktsüner, kechiyong item ozüingji aluyimertem ajungtsü atema masü," ta ashi.

Aluyimertemi gari lenmang mokdangyonga ambulance aser school bus densema rongdak nüngdak senzüba garitembo menokdangi liasü.

Delhi nungbo Shaheedi Park anasa police-i nisung 50 shi puogo.

Ano külen Delhi Deputy Chief Minister, Manish Sisodia-i BJP-i aniba Centre sorkar dang aluyimertemi akhangbaji tekaraba nung agizüktsüla, kechiyong Delhi nung lendong tulu ataloktsüsa lir, ta metetdaktsü.

March ita nungi arrshi küm 50 temapurtem nem vaccine agütsütsü

New Delhi, February 06 (Agencies): India nung coronavirus tashidak anema vaccine agütsüba shilem asembuba nung arrshi küm 50 dak temapurtem aser co-morbidities keta alir arrshi 50 dang nungi tekübokpurtem nem vaccine agütsütsü, ta Honibarnü Union Health Minister, Harsh Vardhan-i Lok Sabha nung metetdaktsü.

Covid vaccine agütsüba shilem asembubaji March ita tomlen nungi agitsüa akok, ta Union Minister-isa metetdaktsü.

Lok Sabha nung Question Hour minute 15 shi agiba mapang

vaccine agütsüba dak sendakba nung tasüngdangbatem langzüdang Vardhan-i iba osang ya metetdaktsü.

Question Hour mapang nunga opposition party balala nungi züngsemtemi aluyimba ozüing tasen asem anema longkak aita liasü.

Tawa sorkari, kobi melii arrshi küm 50 dang nungi temapurtem nem vaccine agütsütsü, aser parnok rongnungia arrshi küm 60 temapurtem nem tama agütsütsü, ta metetdakja liasü.

Health minister-isa, tang tashi nung linük 22-i India dang

coronavirus vaccine agüjang ta mepishiogo, ta metetdaktsü.

"Item linük nungjagi sorkari linük 15 nembo teyari ama mesüra tezüngzüktep ka agia vaccine agütsüogo. February 1 tashi nung item linük nem vaccine dose lakh 56 teyari ama agütsüogo aser contract basis nung dose lakh 105 agütsüogo," ta metetdaktsü.

Tang tashi nung linük nung nisung million 5 dak tema nem vaccine agütsüogo aser April ita tashi nungbo health & frontline workers crore 3 nem iba vaccine agütsütsü sorkar tebilemba lir.

Mamata-i West Bengal nung PM Kisan scheme memela: J P Nadda

Malda (West Bengal), Febuary 06 (Agencies): Honibarnü BJP National Tir, J P Nadda-i, West Bengal Chief Minister, Mamata Banerjee-i state nung aluyimertem nem PM Kisan scheme nungi tajangzük magütsü, ta aitsü.

Nadda-isa, "Jai Shri Ram" ta yimyim ayimba atema kechiba lai jashir, ta ashi.

BJP-i ita ka piyong agiba "Krishak Suraksha Abhiyan" sentong nung jembidang pai, state nüburtemi assembly election tembangba sülen Mamata aser lar party (Trinamool Congress) dang tatembang salem ashitsü telemtetba agiogo, ta ashi.

"Mamata-i Bengal nung aluyimertem nem PM Kisan Scheme tajangzük magütsübaji tim masü. La mezümeküma lai state nung welfare programme (PM Kisan Scheme) ya benoktsü atema temelaba magütsü," ta BJP Tiri metetdaktsü.

"Tangbo aluyimertemi iba scheme agitsü atema temelaba agütsüba sülenbo laia iba scheme melatsü ta jembir. Tesüiba küm ana tashi aluyimer lakh 70-i küm shia sen meyrjang trokrok (6,000) teyari magitet," ta Nadda-i ashi.

"Krishak Suraksha Saha-Bhoj" dak sendakba nung Malda kübok Sahapur yimdak moapu nung pai nüburtem den chiyunga liasü.

January 23, 2021 nü Kolkata nung tatalokba dak sendakba nung J P Nadda-i, "Ni yagi aruba mapang nung nüburtemi 'Jai Shri Ram' yimyim ayima ni agizük, ajisüaka iba yimyim agi Mamata jashibaji ni mangateter," ta ashi.

January 23 nü Victoria Memorial, Kolkata nung Netaji sor küm 125 ajungba anogomong sentong nung lokti rongnung kari Jai Shri Ram yimyim ayimba agi Mamata-i la onük metenzüki liasü.



Hyderabad, February 06, 2021: Honibarnü Hyderabad nung osangbenertem senden ka nung Union Minister of State for Finance aser BJP lenir, Anurag Singh Thakur aser Telangana BJP Tir, Bandi Sanjay Kumar nati jembidang tangokba noksa nung angur.

Tang mezüing tetsür team CoBRA Commando unit nung aniok

Gurgaon, February 06 (Agencies): Honibarnü tang mezüing CRPF tetsür team ka commando force CoBRA nung aniokogo; linük nung Maoists telungpurtemi timtem agütsüba tesemtem nung raratsü atema parnok yoktsü.

Intelligence nung ajemdaker arem nung telungpurtem anema raratsü atema 2009 küm CRPF kübok Commando Battalion for Resolute Action (CoBRA) ya tenteta liasü; tang tashi nungbo CoBRA nung teburtem dang liasü saka tang mezüing tetsürtema anioker.

CoBRA team nung commando temi Maoists telungpurtemi timtem agütsüba state tem nung tenzükdang parnok aikati shisatsü aser shi naprongla nung timtem kanga ajurur.

Honibarnü Gurgaon kübok Kadarpur yimdak iba sentong agidang CRPF Director General, A P Maheshwari-i CoBRA nung shimba

tetsürtemi combat drills agiba repranga liasü.

Tang CRPF nung tetsür battalion 6 lir aser iba nungjagi 34 CRPF battalion CoBRA nung züngoker, ta Central Reserve Police Force (CRPF) otongdar kati metetdaktsü.

"Item tetsürtemji ita asem tashi training agitsü iba sülen CoBRA units nung züngoka Chhattisgarh kübok Maoists telungpurtemi timtem agütsüba districts Sukma, Dantewada aser Bijapur-i yoktsü," ta otongdarisa metetdaktsü.

1986 küm February 6 nü mezüingbuba battalion nung tetsür sepai 88 liasü aser tangbo tetsür unit trok lir, aser unit shia nungji sepai 1000 lir.

Iba sülen 2012 küm CRPF nung tetsür temeja pipe band tenteta liasü.

Tang CRPF sepai ajak agi lakh 3.25 shi lir aser parnok timbaka Jammu & Kashmir, Maoists-i timtem agütsüba state tem aser northeast state tem nung lir.



Kolkata, February 06, 2021: Honibarnü Kolkata nung All Bengal Teachers Association (ABTA) küm 100 ajungba Jubilee mong sentong nung Left Front Chairman, Biman Bose-i jembiba noksa nung angur.

Myanmar nung nisung meyrejang aikati longka ait



Singapore, Tsüklai/February 6 (Agencies): Honibarnü Yangon nung nisung meyrejang aikati yimtung nung iba hopta military-i sorkar atsüngba anema aser election ajanga shimba lenir Aung San Suu Kyi chiotsü khanga longkak aitogo. Internet shibangtsür liaka nüburtemi aikati iba inyakyim anema longkak aitogo.

Linük nung yimti tuluba nung nüburtemi "Military dictator, fail, fail; Democracy, win, win" ta yimyim ayim aser "Against military dictatorship" ta zülua bener longkak ait. Longkak aiterem nem iba sentong nung shilem magirtemi chiyongtsü aser tajem tzü agüja liasü.

Longkak aiterem aikati Suu Kyi-i aniba National League for Democracy (NLD) indang sentsü temerem semer shilem agi. NLD-i November 8 nü agiba election akok, saka general temi election ya ochi meshi akok ta shia iba election magizüker.

Honibarnü Yangon yimtung benjung ama liasü; gari temi horn agüja oaba den nisung meyrejang aika City Hall leni ao. Gari anirtemi pei gari nungi angüzüka alur three-finger salute agütsü aser yamaji parnok süiba repranga alirtemia telangzüba agüja liasü. Parnok rongnung karibo NLD wako aser Suu Kyi indang noksa amer liasü. Nisung aikati teka amaba den tsüngsanga liasü.

Lokti adenshi tenzüka sülen internet shibangtsüaka longkak aiterem tali tali adenshi.

Monitoring group NetBlocks

Internet Observatory-i "linük ajunga nung internet shibangtsüogo," ta Twitter nung ashiba den connectivity shilem tashi ajema aluogo. Mobile data services aser wifi dena shibangtsüogo.

Junta-i iba ken o dak sendakba nung kecha telangzüba magütsü. Facebook shibangtsüba sülen parnoki Twitter aser Instagram shibangja liasü.

Facebook-i, internet shibangtsüba kanga tebilemstü kaa lemsatepogo aser Junta dang internet lapoktsütsü asoshi khangaogo.

"Iba amala mapang ka nung Myanmar nunger tem pei temeimbatem den tongteprateptsü atema aser tongtibang osangtem angazüktsü kanga tongtibang lir," ta Asia-Pacific nung tang renloka oya aliba linüktem atema Facebook public policy tekolakba Rafael Frankel-i ashi.

United Nations human rights office-i Twitter ajanga, osang angazüktsü aser pei tebilemba lemsateptsü atema internet aser communication service tem lapoktsütsüla, ta ashi.

Norwegian mobile network provider Telenor ASA-i, ketdangsürtemi mobile operator ajak dang data network khen atema shibanga toktsütsü atema tetuyuba agütsüogo, ajisüaka voice aser SMS services bo lapokja lir, ta ashi.

Activists aikati Facebook shibangtsüba toktsür virtual private networks amshir, saka internet shibangtsüba ajanga

independent new aser osangtem angazüktsü kanga mesüa kümdaktsür aser sentongtem ayongtsü mesademi kümdaktsür.

Myanmar nung lokti tentetemi internet providers aser mobile network tem dang Junta-i ozüng agütsüba sentoktsü mepeshia asüngdangogo aser ashiba agi iba ajanga military tashi tali kümdaktsür.

Telenor-i ashiba agi, parnoki ketdangsürtem dang telecom services kecha tenokdangba makai agütsütsüji kanga tongtibang ta shiogo. Ajisüaka parnok local temzüng ozüng kübok inyaksangshir aser parnok atema mapa tongtibangtibaji company nung inyakba local tem kümzüka ayutsüji lir, ta ashi.

Amnesty International indang deputy regional director for campaigns, Ming Yu Hah-i, COVID-19 wawra pokteter aliba aser sorkar coup sür aliba mapang internet shibangtsütsü atema telemtetba agibaji kanga dang telemtetba tai lir.

Army chief Min Aung Hlaing-i, election nung ochi mashi inyakyim lir ta shia sorkar amokbang, ajisüaka electoral commission-i, November ita election nung ochi mashi inyakyim kecha merprangteter, ta ashi.

Junta-i küm ka atema state of emergency benokogo aser election agishiba sülen mapa belenzüktsütsü nangzükogo, saka mapang tejangja ka atakzükja mali.

China-i Nepal nem Covid-19 vaccine dose 500,000 agütsütsü

Kathmandu, February 6 (Agencies): China-i grant basis nung Nepal nem COVID-19 vaccine dose 500,000 agütsütsü, ta ketdangsürtemi Honibarnü Nepal sorkar nem metetdaksü. Hokolbarnü nikongtsütsü Nepal foreign minister Pradeep Gyawali den phone ajanga sensaksemba mapang Chinese Foreign Minister Wang Yi-i, China-i vaccine dak sendakba nung Nepal tontibangsa nongita yaritsü, ta shiogo, ta Ministry of Foreign Affairs sangdong ka ajanga metetdaksü.

Wang-i, China-i grant basis nung Nepal nem COVID-19 vaccine dose 500,000 agütsütsü, ta shiogo. Xinhua sangdong ka ajanga ashiba agi, Gyawali den sensaksemba mapang Wang-i, Nepal nung COVID-19 vaccines tang kanga nüngdakba angateta lir aser COVID-19 vaccines mezüngbuba shilem agütsütsü atema telemtetba agiogo.

Kathmandu nung Chinese Embassy sangdong ka ajanga tawa, China-i Nepal nem COVID-19 vaccine dose 300,000 agütsütsü aser iba ajanga Nepal nunger 150,000 ajangzüktsü imlar, ta ashi.

Foreign minister ana tsüngda sensaksemba mapang China-i vaccine dose 500,000

kümtsü, ta My Republica portal sangdong ka ajanga metetdaksü. Ajisüaka vaccine yagluba China nunger company yagi tang tashi Nepal sorkar nem tenüngdakba kuli kaketttem agüja mali. Sorkari temelaba magütsüra Sinopharm-i yangluba BIBP-CorV vaccine ya Nepal-i bener marutettsü, ta kasa sangdong ajanga metetdaksü.

Mongintemi alima ajunga nung vaccine agütsürtem rongnung India ya tongtibang linük ka akümtsü ta ashiba mapang Nepal nem coronavirus vaccine agütsüba ya vaccine diplomacy ka amenoktsü atema merangdangba ama reprangteter.

January 22 nü India-i Nepal nem India nung yangluba COVID-19 vaccines dose million 1 sempet agütsü. Iba vaccine ya tang health workers, employees aser security personnel tem nem agütsüdar. Nepal densema subcontinent nung Bangladesh, Sri Lanka aser Maldives, kong Beijing-i sen aika intoka arudar, item linüktem yagi India nung yangluba vaccine shimba ya

China-i imlaa maliba maparen ka liasü.

Pakistan-i India den sensak asemstü mulunga lir

Islamabad, Tsüklai/February 6 (Agencies): Pakistan Ato Kilonser Imran Khan-i Hokolbarnü sensak asemstü atema India nem maongka agütsüogo, ajisüaka Jammu and Kashmir nem jenjang balaka agütsüba Article 370 tanaben benokba sülenang sensak asemstü ta ashi.

Pakistan-i atsünger aliba Kashmir kübok Kotli district nung lokti senden ka nung o jemiba mapang pai iba olen lemsatep. Pakistan nung 1991 küm nungi kümshia February 5 nü "Kashmir Day" munga arudar.

India-i Brehostibarnü ashiba agi, sensak asemstü atema Pakistan-i arrtsü aden kiranglongrartem inyakyim nokdangtsüla, ta shiogo.

"Arung onok den Kashmir ken o bentetdang. Aser iba atema nenoki tamasa Article 370 benokshitsüla. Iba sülen onok den sensaksemang. United Nations Resolution dak ajemdaker Kashmir nunger nem parnok temeden agüjang," ta Khan-i ashi.

"Nenok den sensak asemstü atema onok ano renema lir. Ni Modi dang sensaksem ajanga Kashmir nunger ken o bentettsü asüngdang, ajisüaka onoki lenji aruba ya onok tashimaitba

ajanga ta tangatet. Ni sensak asemstü atema India PM Narendra Modi aiben jaokogo, kechiyong iba ajanga dang ken o bentettsütsü," ta Khan-i ashi.

Khan-i, Pulwama tatalokba sülen India nunger ketdangsürtemi yimjung maginer aser tesendaktep tajung meyuner aser iba ken o ya yimden yimsüsüba tsütsü tajangzük asoshi amshiner ta angatetogo, ta ashi. Pai India dang RSS indang fascist" ideology toktsütsü shiogo. "Iba amala fascist ideologies ya lendong tulutiba lir. Iba ajanga pei linük raksaa tembangtsü," ta pai ashi.

"Linük (India) lemdanger lir. Muslim nunger tem aser aluyimertem kangshidar. Lokti nung nübo agi ajema alirtem ajak tetsübu nung lir," ta Khan-i ashi. "Iba amala tebilemdangba ajanga election akoktsü akok, saka fascist ideology ajanga lokti tamendakdak raksatsütsü," ta pai ashi.

Khan-i ashiba agi, Pakistan-i Kashmir nunger nem parnok tarutsü lemtetdaksüner.

"Kashmir ken o ya 1948 küm nungi tang tashi mebenteti arudar aser iba ya East Timor ama ken o bentetba yimya nung bentettsütsü," ta PM khan-i ashi.



US tir Joe Biden, den Vice President Kamala Harris nati White House Oval Office nung House Speaker Nancy Pelosi, House Majority Whip James Clyburn, House Majority Leader Steny Hoyer, Rep. Peter DeFazio, D-Or., Rep. John Yarmuth, D-Ky., nunger den sensak asema noksa nung angur.

DC Wilfred IAS-i Noklak Town Council Office semzüktsüogo



Noklak, Tsüklai/February 06, 2021 (TYO): Honibarnü, Deputy Commissioner, Noklak, Reny Wilfred, IAS-i DC Office complex nung Noklak Town Council Office cum Facilitation Counter building semzüktsüogo. Iba Office building lapokba sentong nung alakteta tejaoker ama DC-i jembiba mapang pai, tesem tezü nung inyaker Officer, medical staff aser tesayurtem, shirnok tanendak ki tajung maliba ajanga mepetmesü adokba pungbadaktsütsü nükjidong nung iba ki yanglutsü, ta ashi. Ajaki meranga inyakba ajanga, tanü asangsang nung iba ki takok ngua renemtetogo, ta DC-i metetdaktsü. Pai ashiba agi, iba District kübok tanga maparen rongnung alu nungi züsentetbatem ayokba, ango metsühba, sü atakba, teka mapa (handicrafts), azük yangluba (bead making) aser tourism sector tsütsü renloktsü tashi lir, ta metetdaktsü aser iba District nung Education City & Tribal University ajanga temelenshi tulu adokdaktsütsü imlar, ta ashi. Noklak district nung tetsürtem ajungkettsütsü asoshi Khamniungan Menyiu Hoikam ajanga District nung taxi service tenzüktsüla ta DC-isa tebilemba kar ashi aser marendaki pei teshisadangba tem lemsateptsüla, ajiasünungang tarutsü project maparen nung temelenshi tajungba adoktsü, ta pai ashi. SDO (Civil) Noklak & Administrator Noklak Town Council, C.Phuniang-i ajak dang meranga inyaktsü ajungshi aser anogo 10 tsüngda iba project takok ngua renemtetba atema pai Deputy Commissioner dang pelaba metetdaktsü; aser nübur ajangzüksüsa iba office tajungtiba nung amshitsü atema pai mepishiogo. Khamniungan Tribal Council President, M.Thangou-i DC Noklak, Reny Wilfred, IAS dang alakteta pelaba shisem. District kübok lenla ajunga nung terenlok alitsü asoshi, pai Noklak District nung alir nüburtem dang District Administration aser Sorkar den amalitepa inyaka aotsü mepishiogo. Noklak tesem District jenjang agütsür sülen ita trok tsüngda maparen renloka aoba indang EAC Yithachu Thur-i metetdaktsü. Tarutsü anogotem nunga District nung terenlok alitsü asoshi nübur ajak dang longjemer inyaktsü mepishi. Executive Secretary, Khamniungan Baptist Church Association, Hempao-i iba ki meshiteta sarasademtsü. Maneni, Noklak Town Council Office cum Facilitation Counter building lapokba sentong nung EAC L.Mongo Khamniungan menden liasü. Noklak indang DB temi akhi tetsü tebou ken ka aten aser District Planning Officer, Noklak, Imsumeren Jamir-i tepela anküp o jembi.

KPC-i mangyim tejashi lemsateper

Kohima, Tsüklai/February 06, 2021 (TYO): Honibarnü, KPC Joint Secretary, Alem Jamir tetsü Nukshilila, Dimapur nung asüba osang angashia Kohima Press Club-i mangyim tejashi lemsateper. La arishi küm 87 liasü, ta KPC sangdong ka ajanga metetdaktsü. Temeim tetsü ka aser teintet rogu tajung ka asüba angashia KPC-i asür kinungertem den külemi mang ayimer. Mang yima alirtem tesünap angutsüsa o agi dangbo mabensatsüteter, saka tang ama asükhu mapang ka nung Tulusang Tsüngremi parnok nem tashi aser tesünap agüjangma ta onoki sarasademtsür. Asür kinungertem den tejashi lemsatepba mapang, asür tanela teti tatem maka nung anisüngzüktsü onoki sarasademtsür, ta kasa sangdong nung shia lir.



Dimapur, Tsüklai/February 06, 2021: HQ IGAR (North) kübok Dimapur Battalion indang Assam Rifles-i Hokolbarnü (05.02.2021) Thilixu Village, Dimapur nung Naga nunger atema Cultural Centre den takdang balala aketba ki yanglutsüogo. Iba Cultural Centre ya Op Sadbhavana kübok yanglua liasü aser village council züngsem 30 densema Village GBs aser Chairman matsüngdang Dimapur Battalion - Assam Rifles-i iba Centre Thilixu village nem bendanga agütsü. Nagaland ajunga nung sobaliba sentong tem sayua aser ajungkettsütsü nükjidong yur iba ama mapa tajung ajiteta inyakba atema yimertemi Assam Rifles dang pelaba metetdaktsüogo.

FOR SALE

Land with building at Tolazouma 70x90

Contact No : 9436261830 / 8413005211

Peren DPDB senden amen

Peren, Tsüklai/February 06, 2021 (TYO): Honibarnü, DC Conference Hall, District Hq. Peren nung, February ita atema Advisor Water Resources, Namri Nchang mendenbuba ser Peren District Planning & Development Board senden agiogo. Iba senden agiba mapang, Peren Govt. College belentsü maparen dak sendakba nung, College Principal dang nüngdakba inyakyimtem achaayangtsü asoshi maparen nüngloktsü aser Peren Govt College belentsü asoshi renemba maparen nung Department balala indang HODs dang nungita yaritsü asoshi Advisor-i mepishiogo. Peren Hq. nung District Jail lapoktsü atema board olemtep aser iba maparen dak sendakba nung, Land Possessing Certificate nung ajemdaker asalentong renemtsü aser tim Department dang metetdaktsütsü asoshi Dy. Superintendent of Jail Peren nem mapa nüngloktsü. Taoba DPDB senden nung Board ajanga nüngloktsüba ama, Technical Assistant (REB) Peren, Vivian Solo aser District Sericulture Officer, Yingsungbeni Ngully nati departmental inyakyimtem board züngsemtem dang metetdaktsüogo. Kasa senden nung, Urban Planning maparentem dak sendakba nung, SDO (C), LRSO aser Urban Development Officer nati metetdaktsü. Taruba ita, DPDB senden atema, Department of Statistics dang departmental inyakyimtem PowerPoint ajanga sayutsü asoshi tetuyuba agütsüogo.

2021 Suzuki Hayabusa sayaogo



New Delhi, Tsüklai/February 06, 2021 (Agencies): Online ajanga meimbanga aliba prokba sülen anogo ishika lir, Suzuki-i alima ajunga nung 2021 Hayabusa motorcycle sayaogo. Hayabusa ya taoba design tem kangarabo memelenshi yimya balaka nung yanglua lir, koba peregrine falcon ozü ajanga ajungmesoa yangluba motorcycle ka lir. Hayabusa Motorcycle engine tasen alitsü, kong 1340cc, four-cylinder, DOHC engine ya Ride-by-Wire electronic throttle bodies den dual fuel injector ajanga achaayangtsür. Motorcycle nung symmetrical twin silencer exhaust system tasenba ya taoba model dang nungi tepungbaba lir. Iba den külemi, motorcycle nung twin-spar aluminum frame aser adjustable KYB-supplied suspension inoka yanglutsüogo. Hayabusa model tasenba nung Suzuki Intelligent Ride System (S.I.R.S.); electronic rider talisa Cruise Control aser Bi-directional Quick Shift system dena lir. Hayabusa nungang item premium feature angutsü aser iba ya ajanga performance tajungba agütsür aser motorcycle anirtemi sportbike experience balaka angutsü. Iba motorcycle nung TFT LCD panel tasen inoktsüogo, koba Hayabusa indang nüngtugu analog instrument cluster den külemi yanglutsü. LED lighting tasen nung projector aser multi-plane headlight, plus forward position lights aser combination taillight nung integrated turn signals inokja lir. Motorcycle tejaklen, braking tsütsü nungittsü atema Brembo Stylema caliper tasen aser brake disc tuluba inoktsüogo. Hayabusa model tasenba atema, alakteta Bridgestone Battlax Hypersport S22 tyre yanglua inoktsüogo. Hayabusa model ya Glass Sparkle Black & Candy Burnt Gold, Metallic Matte Sword Silver & Candy Daring Red mesüra Pearl Brilliant White & Metallic Matte Stellar Blue sentsü nung angutsü. Iba den külemi, motorcycle sentsü balala nung Hayabusa Kanji symbols aser model logo dena lir.

Serie A: Inter Milan-i goal 2-0 agi Fiorentina akok



Florence, Tsüklai/February 06, 2021: Hokolbarnü Florence kübok Artemio Franchi Stadium nung Fiorentina aser Inter Milan tsüingda Serie A asayaba mapang, Milan atema Ivan Perisic-i goal tanabuba idaktsür sülen külem team pur den pelatepba yangi angur.

Tsüklai/February 06, 2021 (Agencies): Hokolbarnü, Serie A asaya nung Inter Milan-i ayong ayonga dang goal 2-0 agi Fiorentina akokba sülen, Serie A table nung temaba jenjang tongteta lir. Milan atema Nicolo Barella aser Ivan Perisic nati goal ka ka inoktsü.

Iba asaya tenzükher ghonda tesadangka tashi telok kati danga goal meinoktsüteti asaya aser minute 31buba nung Inter atema Barella-i mezüing goal inoktsü. Keeper Bartlomiej Dragowski-i iba goal nokdangtsü atema ball metsüloksülen pungokdang, saka Bart-i ball menokdangtet.

Kasa mapang, Inter Milan keeper Samir Handanovic-i

goal ana tashi nokdangteta par telok goal 1-0 agi Fiorentina tejakdang ser mezüing half tembang.

Tanabuba half tenzükher minute 7buba nung Perisic ajanga tesemdanger team - Inter Milan atema goal tanabuba idaktsü.

Inter-i ano goal idaktsütsü maongka angu, saka goal ana dak alia parnoki goal talila meinoktsütet. Tang, Serie A table nung Inter Milan pur point 47 nung AC Milan ajateta, temaba jenjang tongteta lir. Ano külen, Fiorentina-a point 22 ngua jenjang 12 tongtetogo.

Deobarnü, AC Milan aser Crotone na asayatsü.

"Iba asaya tajung liasü, saka onoki goal timba idaktsüa aser

asaya kara tembanger lila. Ajisiüaka, onoki temaba jenjang tongtetogo aser ibaji ajak dang tongtibangtiba. Tang nungi tenzükher asaya ajak tongtibang ama bilema aibelen mesüi asayatsüla," ta Perisic-i Sky Sport Italia dang ashi.

Inter Milan coach, Antonio Conte nem touchline ban agütsür aliba ajanga, külem team pur den mesüi stands nungi iba asaya reprangtsüsa aküm, saka Milan-i iba asaya akokba ajanga pa pelaa alitsü imlar.

Barella-i Inter atema mezüing goal meinoktsüdang, paisa metsüba goal ka Dragowski-i nokdanga liasü. Iba asaya nung pai idaktsüba goal densema tan season nung pai goal 8 idaktsür alitsü.

Bundesliga: Bayern Munich-i Hertha kokogo

Berlin, Tsüklai/February 06, 2021 (Agencies): Hokolbarnü, Bundesliga asayamung nung Bayern Munich-i goal 1-0 agi Hertha Berlin kokogo, kong Robert Lewandowski-i penalty ka metsüpet saka Kingsley Coman-i goal ka idaktsü.

Iba league nung Bayern-i asaya pungo tashi atonga takok angur alitsü; kasa mapang Hertha pur taoba asaya trok nungi point ka dang ngua relegation zone-i ayitsü lendongbang nung lir.

Contract nung aniokba asayar tasen ana - Sami Khedira aser Nemanja Radonji? na Hertha nung mezüing asayaogo. Tanabuba half nung Sami aser Nemanja na moapu telungi aita asaya, saka Hertha nungi Matheus Cunha-i metsüba goal ka net tezülen tukadok.

Iba asaya mapang, rüjep alaba ajanga asayartem kanga

timtema asaya. Iba den külemi Hertha-ia 8ben tashi Bundesliga asayamung takok angur telok - Bayern nem goal idaktsü atema maongka magütsüi parnok azüoka asaya.

Dodi Lukebakio-i offside adena ball bener lur minute 3buba nung goal idaktsütsü merandang, saka Neuer-i ball ajepzükadok.

Hertha keeper Jarstein-i Sane dak asaya yimya den mapet benshiba atema, Bayern-i penalty ka metsütsü maongka angu, saka minute 11buba nung Lewandowski-i metsüba penalty ya Norway nung Jarstein-i nokdang.

Bundesliga asayamung nung, 2013 küm Borussia Dortmund atema Lewandowski asayadang, pai metsüba penalty ka Neuer-i nokdangba sülen nungi Poland football star Lewandowski-i metsüba goal nokdangteter keeper rongnung Jarstein tanabuba kümogo.

Iba asayamung nung Lewandowski-i penalty metsüpetba ya aiben atalokdanga mali. Taoba mapang pai penalty 11 idakja aser tesüsa asayaba league asaya tuku nung pai goal idaktsüogo. Tan season nung Lewandowski-i goal 24 idakja lir. Ajisiüaka, Niklas Stark nungi ball rakzükba mapang, tiaka tesemdanger team - Bayern Munich atema minute 21buba nung Coman-i goal ka idaktsü.

Iba goal idaktsüba ngua, Hertha coach Pál Dárdai kanga mepelai kümadok. Ano külen, Hertha defender Jordan Torunarigha tepi teloktep yiruba ajanga mezüing half matongdang asaya nungi tukadoktsüsa aküm. Tanabuba half nung, Serbia nung winger asayar Radonji?-i minute 63buba nung goal ka idaktsütsü maongka tajung ka magitet. Pai goal meinoktsütet yongjia asaya nung junga shilem agiogo.

India vs England: Joe Root-i otsü tasen yangluogo

New Delhi, Tsüklai/February 06, 2021 (Agencies): Honibarnü, England captain Joe Root-i Test asaya 100buba nung double century yanglua, iba alizüing tongteter rongnung pa mezungbuba kümogo.

Chennai yimti kübok MA Chidambaram stadium nung India aser England tsüingda Test series asaya pezü nungi mezüing test asaya tanünübuba nung Joe Root-i iba maparen ajangzükter.

Iba asaya nung, Root-i run 196 yanglur aliba mapang, India spinner Ravichandran Ashwin indang ball nung pai 'long-on' tsütsü six ka züklokja double century yanglutet. 'Six' ka züklokja double century yangluteter England nung cricket asayar rongnung Root mezungbuba alitsü.

Iba alizüing tongtetba den külemi, Root-isa taoba mapang Pakistan nung cricket asayar takoktet, Inzamam-ul-Haq indang 100buba Test record ajangtetogo.

2005 küm Bengaluru nung

100buba Test cricket asaya nung run timtiba yanglurtem

PLAYER/TEAM	SCORE/OPPONENT	VENUE/YEAR
Joe Root (England)	218 vs India	Chennai, 2021
Inzamam-ul-Haq (Pakistan)	184 vs India	Bengaluru, 2005
Gordon Greenidge (West Indies)	149 vs England	St John's, 1990
Javed Miandad (Pakistan)	145 vs India	Lahore, 1989
Ricky Ponting (Australia)	143* vs S/Africa	Sydney, 2006

Gippsland Trophy: Osaka aser Azarenka na tukadok

Melbourne, Tsüklai/February 06, 2021 (Agencies): Honibarnü, World no. 3 Naomi Osaka aser anaben tashi tongtibang asayamung takok angula Victoria Azarenka naprongla yiruba ajanga tang asaya aliba Australian Open warm-up asayamung nungi tukuogo. Hokolbarnü, Serena Williams aser Simona Halep nata temang nung timtem ajanga iba warm up asaya nungi tukadok.

US Open aser 2019 Australian Open asayamung takok angula Japan tsür Osaka-i Gippsland Trophy semi-final nung Elise Mertens den asayatsü renemer liasü, saka la temang nung timtem aliba ajanga iba asaya nung lai shilem magitettsüsa aküm.

"Tanü iba asaya nung shilem magitetba atema tennis Australia aser fans dang tatok meshir," ta tan WTA indang Twitter account nung lai lemsatet.

"Kü temang nung timtem tilaka lir aser Australian Open tenzüktsü aliba anogo ishika dang lia ni tali kümdangshitsü nüngdaker. Iba timtem tajungba küma, aruya aliba hopta iba asayamung nung shilem agitettsü imlaa atar," ta Osaka-i ashi.

Hokolbar aonung, Osaka-i kanga junga asayaogo aser lai minute 76 nung Irina-Camelia Begu madak 7-5, 6-1 agi takok angu.

Osaka masayadang, Hokolbarnü America tsür Serena Williams-i quarter final koka world

India aser Pakistan asayaba mapang, Inzamam-i run 184 yanglutet. Küm 16 sülen, England nung Root-i Inzamam indang record ajangteter alitsü.

Batsman Root, shibai 2012 küm India nung Test asayamung nung külem team pur den mezüing asaya aser Sri Lanka nung 228 aser 186 agi akokba mapang shilem agiogo, pai England nung asayar tejen Colin Cowdrey aser Alec Stewart na jenjang menepa 100buba Test asaya nung century yangluteter asayar ka kümogo.

Honibarnü (Tanunübuba Test) asaya nung Shahbaz Nadeem-i Joe Root out mesütsüdang, pai four' 19 aser six' 2 densema ball 377 nung run 218 yanglutet.

Arishi küm 30 tain Root, shibai over 49 average nung run 8,000 dak tema yangluogo, Test cricket asaya 100 nung shilem agir England nung rongnung pa asayar 15buba alitsü.

no. 1 Ashleigh Barty den semifinal asayatsü renemer liasü, saka Williams tapubang nung timtem aliba ajanga iba asaya nungi tukadokba sülen, Osaka asaya nungi tukur alitsü.

Yarra Valley Classic nung arishi küm 39 tain Williams-i külem America tsür Danielle Collins madak 6-2, 4-6, 10-6 agi takok angu, saka iba asaya mapang la dak timtem aliba kecha mesayu aser ghonda ishika lir la semi-final nungi tukadok.

Anaben tashi Australian Open takok angula Azarenka-ia Honibarnü Grampians Trophy tetsür kija quarter-final tetoktepba nung Anett Kontaveit den masayatsü metetdaktsü. Azarenka terberem nung timtem aliba asadangteta, la quarter nungi tukadok.

Gippsland Trophy final nung Mertens-i Ekaterina Alexandrova mesüra Kaia Kanepi den asayatsü; kasa mapang Yarra Valley Classic decider nung Barty-i anaben Grand Slam takok angula Garbine Muguruza mesüra Marketa Vondrousova den asayatsü.

Williams aser Osaka na asaya nungi tukadokba ya aruya aliba Australian Open atema anisüngzüktsü asoshi lir, ano külen Halep temang nung timtem aliba ya tebilemtsi lir.

Gippsland Trophy quarter-final nung world no. 2 Halep ya 6-2, 6-1 agi Alexandrova-i tsükdaktsü. Iba asaya mapang Halep terberem yirua liasü.

BILEM DANGANG

"Lokti tentet ajakji tangazükdak tajung dangbo masü."